

24/10/1998

Ahli akademik anggap langkah tepat

AHLI akademik tempatan menyifatkan langkah kerajaan menambah peruntukan terhadap sektor pendidikan kepada RM13.5 bilion dalam Belanjawan 1999 sebagai keputusan tepat dalam usaha menjadikan negara ini sebuah pusat kecemerlangan pendidikan.

Mereka berpendapat keputusan mengutamakan bidang pendidikan dalam keadaan ekonomi negara menghadapi kegawatan membuktikan kesungguhan kerajaan dalam usaha melahirkan lebih bilangan tenaga mahir di negara ini.

Naib Canselor Universiti Malaysia Sarawak (Unimas), Prof Datuk Dr Mohd Zawawi Ismail, berkata pertambahan peruntukan yang dibentangkan menunjukkan kerajaan bertindak tegas dalam usaha memulihkan keadaan ekonomi negara.

Katanya, belanjawan yang berhemat, positif dan berani itu melebarkan peluang pendidikan kepada lebih ramai pelajar melalui peningkatan prasarana dan penginapan di institusi pengajian tinggi awam (IPTA).

Selaras dengan itu, katanya, pengambilan pelajar ke IPTA turut ditingkatkan dan lebih ramai tenaga mahir akan dapat dilahirkan menjelang tahun 2000.

Selain itu, Dr Mohd Zawawi juga mengalu-alukan peruntukan sebanyak RM2.85 bilion untuk meningkatkan kemudahan di IPTA terutamanya pembinaan kampus tetap Unimas yang sebelum ini terpaksa ditangguhkan akibat kegawatan ekonomi.

Naib Canselor Universiti Putra Malaysia (UPM), Tan Sri Prof Dr Syed Jalaludin Syed Salim, berkata pertambahan peruntukan bagi pembinaan prasarana membolehkan penghantaran pelajar ke luar negara dikurangkan sekali gus mengelakkan pengaliran wang keluar.

Katanya, sistem pendidikan kita mampu melahirkan lebih ramai pelajar yang mahir dalam pelbagai bidang tanpa perlu menghantar mereka ke luar negara atau mengambil tenaga pengajar asing.

"Selain itu, lebih ramai pelajar yang kurang berkemampuan dapat meneruskan pengajian ke peringkat lebih tinggi apabila seramai 24,600 pelajar dijangka mendapat manfaat daripada Tabung Pendidikan Tinggi Nasional (TPTN)," katanya.

Timbalan Naib Canselor (Hal-Ehwal Pelajar) Universiti Kebangsaan Malaysia (UKM), Prof Datuk Dr Wan Hashim Wan Teh, berkata langkah peruntukan yang semakin bertambah membuktikan kerajaan menyedari kepentingan sektor pendidikan dalam jangka panjang dan persediaan awal akan menjadi pelaburan paling berharga pada masa depan.

Selain itu, katanya, peruntukan khas untuk meningkatkan kemudahan dan penginapan pada universiti lama wajar bagi menampung pertambahan pengambilan pelajar untuk keselesaan mereka.

Perdana Menteri Datuk Seri Mahathir Mohamad yang juga Menteri Kewangan Pertama, mengumumkan peruntukan sebanyak RM13.5 bilion kepada sektor pendidikan dalam pembentangan Belanjawan 1999 di Parlimen, semalam.

(END)